


泌園集

十



泌園集卷三十四

明烏程董份著

明故南京刑部江西司員外郎進階朝列大夫凌藻泉公墓誌銘

凌氏其先安吉人當宋時有景夏者舉制科第一同中書門下平章事詆和議稱直臣而其子及亦同平章赴徽宗難死節元有時中者集賢直學士輕車都尉吳興郡侯嘗以兵安集德清諸縣而其子懋翁亦翰林直學士嘗討平西粵諸蠻父子同以勲節顯爲安吉世家而懋翁子壽徙歸安壽生鈞德鈞德生賢賢舉洪武浙江鄉試授教諭知武岡縣轉應天府治中所至治狀有迹

而忤用事者謫均州民會隆平侯張信方博訪天下士
盛言賢可大任宣皇帝異之作招隱歌遣行人賚賜召
馳驛見見大喜命進兵部尙書又命掌都察院事皆謝
疾篤固辭帝知不可奪嘉其志益喜因御書賜老堂字
寵其歸而賢子晏如以書進爲中書舍人嘗寓直召論
事受知擢吏科給事中遷都給事中轉都察院右僉都
御史先是都御史顧佐節廉精白厲風裁爲一時冠人
莫與竝獨僉都御史齊名身居要津數令人抵家鬻產
自給產幾盡及卒而子敷困無聊往依晟閔氏爲婿因
徙晟里凌遂爲烏程人而敷生子震是稱練溪先生先
生嘗爲郡弟子員顧自厭其業方與司空劉公麟進士

施先生侃孫山人一元輩日夜爲古文辭文益高而弗第晚得黔博不旋踵棄去遂坎壈終其身然郡當是時士知薄弟子業翩翩而起有力追古作者之風則自先生與施先生始乃先生敦樸謹飭行義嶢然潔修郡尤信嚮之所著有練溪集行于世而練溪生藻泉大夫大夫少有異才旣承家學長益從施先生游施故多圖書盡出陳示引與其父素所嘗校論者發難揚摧因推乃其趣大夫由是盡得二先生之秘益涉躡廣博網羅百家言務遡其源淵貫穿浹洽其指而發憤思苦抱心疾每劇則中怦怦如車搖轂擊怔忡不能持以是嘗自恨其思未極至其應世酬俗瞬息綴述爛焉可觀譬之握

驪龍之珠啟白虹之劍不覺其奪明月而衝星斗也故
其文一出而海內誦稱之文多未梓乃其子工部君先
梓其書札所謂鳳笙閣抄者見之無不推服云子與大
夫交善每欲序次其文以傳會而將葬而工部君持左
使陳公狀來乞銘遂著之狀言大夫之起家而知全椒
也當南北衝冠蓋絡繹相接民屯雜居號難治太夫下
車振厲釐弊剔蠹案無留牘獄無廋囚數召問謠俗知
民苦養馬養馬者有歲駒之課起俵之需季閱之罰一
馬賈數十金而富者供丁貧者貸役歲俵之馬官給三
千而羨歸吏囊賈責民售坐是馬耗民益困往往乏絕
大夫遂革丁均役鬻羸育駒省閱罷罰因定籍著爲令

官有常核吏無緣爲奸不得復收其羨民困稍息馬亦
益良矣而大夫政先教化暇則數從諸弟子授書明經
示以師法朝夕樂與游縉紳之徒咸來觀聽由是絃歌
洽而頌聲起數薦聞于朝爲諸郡縣最願稍遷知沔陽
州州故大水積逋五萬餘監司屬徵督趣大夫曰民貧
矣吾不忍急稍立假貸法聽民自輸民感之輸先期集
監司亟喜資金幣獎大夫愀然謝曰民以逋負罪而守
受獎是幸逋以爲功非與民一體之義也卒辭之已而
沔復水捍禦稍平而大夫念沔當下區每春夏交荆湖
襄漢之水皆會非人力所能禦也獨築堤可乃請諸所
部而身親臨率之築長堤爲不朽計堤成沔稱凌公堤

因樹德政碑頌績焉再遷廬州府同知值三殿興採石
淮徐間名花斑石石事初起民不知所採聚徒歛財以
鉅萬有吏多侵弁徒或咨怨工是以慢弛當事者懼不
測罪振恐乃檄大夫督之至則躬節省卻供餉爲諸吏
先而親勤勞按行諸徒眾由是吏不敢欺而徒眾爭奮
石就緒矣殿成有白金文綺之賜外郡受賞蓋異數也
而人所最奇者當在椒時賊師尙詔起將窺南都而椒
近郊一夕十八報大夫乃誓眾曰南都天下根本賊過
椒則長江勢與其矣吾必以外守之因扼險置哨益募
勇敢移文請屯操兵列營十里布旗鼓揚聲嚮爲畿邑
援部使者視師曰賊方迫吾從西來大郡且烏獸散彈

凡地顧有貔虎士耶會賊寢謀而大夫威名震諸使者
皆察舉之其在沔有胡廷璧者始負固抗捕稍稍集亡
命浸強因圖不軌官欲興兵討恐益激卽緩之慮其後
不可制方莫如何大夫曰是烏合散之易耳乃遣兩力
士受方略出其不意擒其渠魁眾遂瓦解蓋談笑而定
之云工部數爲予言大夫與人和無町畦至其介有嶽
嶽不可動者嘗奉檄權鹽諸商實金于甕名餽酒怒而
責遣因以平權廬有斷事某以雅故餽茶受置于室而
實爲其親犯法求解發茶得金因追還立抵其親于法
有勢權求郡縣賂不得輒加辱獨大夫義形于色其人
媿反禮焉嘗曰卽以請謁非義于進雖斫頭陷胸弗爲

也性至孝始舉于鄉當宴而哭及子舉進士報至亦哭
其事足怪而實以父不及見痛之宦游奉母王太宜人
周旋侍養者十餘年逮轉南曹母卒絕弗仕矣志亦有
足悲哉事二兄甚謹悉讓分產弗受歿而諸後事一切
身任之曰兄猶父也其篤行多此類好標獎後輩遇其
鑒識必稱才賢因佐其貧乏賑其窮成就而爲貴人名
士者不可勝數士尤德之居家厭埃塽閉門卻迹數引
墨客與談立詩十格賦咏意灑如也末年喜禪旁及黃
老自謂有得別稱淨因齋主有以仕進勸者瞑目曰吾
已結淨因矣予因爲之銘銘曰嗟乎大夫洞覽古今采
珠文淵擷華藝林卿雲爛漢蔚爲茵輪靈芝擢秀五色

紛綸有典有則如玉如金大雅之什清廟之音未用于
朝郡縣三試不勞而理所至稱治云胡能哉儒學飾吏
倉卒遇變與眾爲誓時無堅城文有武備豈惟守疆思
爲國衛雖曰未戰亦壯敵愾弭亂銷萌卓哉足記旣列
南曹朱紱將至豈伊盛時虛此國士悠悠閉關眇然離
世昔在乃祖謫爲編民隆平之薦實合楓宸朝有遺碩
功歸武臣片言朝入夕馳行人脫之閭閻欲授國鈞煌
煌際遇千載無倫云胡大夫一往不復世無隆平孰與
推轂豈乏才賢隨時反覆用則雄飛不用雌伏我何與
哉任彼爭逐振衣高岡長嘯空谷或爲鸞皇或爲鴻鵠
晚結淨因冥懷二氏百慮無營中夜一氣永綿爾神何

遽奄逝生本有涯祉遺來裔旣榮謝蘭亦森燕桂此焉
葆藏世世無替

明故雲南臨安府檢校東軒閔先生墓誌銘

閔氏其先汴人也宋寶慶中將士某者避亂徙烏程之
晟舍里中遂爲晟舍閔氏六傳而生綬贈柱國太子太
保刑部尙書綬生復復生理是爲先生父先生名芹字
時獻所居東軒遂以自稱云初烏程有二族曰嚴氏閔
氏故皆爲世家而閔氏贈尙書公綬實生莊懿公珪爲
時名臣多更定律令載在國典而晟舍閔氏始著于天
下先生少有大志承其家問弱冠爲郡弟子以力學得
疾幾殆廼以貲爲國子生起家拜雲南臨安府檢校受

牒監稅而臨安爲勝衝金齒夷棘之交號稱煩劇檢校
君至則解燒釋苛除去一切與商旅爲便而益多歲羨
入官人皆稱檢校君廉平部使者異之將察舉君而君
以遠道官薄非其好也遂致仕去檢校君既不樂仕廼
歸東軒稍稍闢館舍益治園庭蒔花竹歲時從父老昆
弟宴聚其間酒酣自暢相與和而歌意彌樂也已而長
嘯人莫測其志云爲人負氣自喜雖豪貴人之有在已
必與辨報務直廼止然在已下者未嘗輕忤性善理財
而豁達不事蓄聚卒之日囊無一金田乃不盈頃少多
病旣老而益康髭髮皆黑起居如童年然竟以嘉靖二
十三年四月四日卒年七十有六而以哭兄致疾人皆

憐之初君之從子如霖爲諭德于朝以病在告也而份適往省之會東軒訃至諭德君忽號哭貿亂一家皆驚份趨入牀下諭德君病益亟悲傷填胸且告且止因言伯父之卒而無子也喪無主者予因得聞東軒君之詳旣而諭德君起視事踰年念東軒之葬病復作而賜告且歸因謂份曰昔者病時惟子見其情矣今伯父墓石敢以累子諭德君卜以今年□月□日葬伯父先大夫贈編修君之阡初贈編修君與孺人相繼早逝諭德君少而孤也厝父母柩室中會火作得雨迺止諭得君自傷日夜泣下而伯父憐之聽納直而捐其地爲墓卽棲梧新阡也先是君配丁氏有側室二人俱無出諭德君

屢乘間請立嗣弗聽而君雅敬信從母弟沈君宗殷亦力請弗聽志倚諭德君也諭德君乃先君未卒之三年建藏於父瑩而君左焉君有養女一嫁太學生沈應暘而應暘亦先卒至是襄大事者唯諭德君一人諭德君以道藝進顯時方議以任大用而亟于請告唯以君故縉紳義之而君亦誠知人得所托矣銘曰嗟乎善可以延世而弗嗣也德可以自致而靈蹟也友于同阡享弗替也從子是顯名則暨也我勒于幽以不墜也

明故封刑部員外郎困吾昌先生墓碑

昌氏宛平人其先以干夫長謫興化戍因徙莆田家焉遂爲莆田人蓋天下言經學必稱莆田而昌先生治尙

書學經明當是時有卓先生者以尙書爲莆田宗門常數十百人獨毛生鄭生昌生稱三雋以次都授諸弟子而毛鄭推昌生謂弗及卓亦曰他日昌吾學者必子也已而卓舉進士顯毛生鄭生相繼登第而昌獨詘有東里黃公者識其才欲言當路伸之聞而亟止曰吾不敢不慎其始也會部使者將舉鄉試先合閩八郡諸弟子而總校之署昌先生第一故事部使者高等卽試見遺必有優異而督學使反抑昌先生擯焉昌先生益困乃退而居鳳山之麓絕意進取不與世通而徒眾從者愈盛益誦說經指剖析疑義無不人人得所欲其弟子遂者翁夢鯉黃楊陳其範等數人未遂而散學官知名者

不可勝數于是閩中大師涉尙書以教者必稱昌先生而昌先生有二子中子應會少子應時先後舉鄉試時復舉進士爲刑部員外郎封父如其官貴矣先是昌先生困也人皆曰三雋同才一鳳在野至是貴則又曰高山有基大海有源昌先生基與源可量哉初昌先生好遊有自遠招致者輒往往必規以道嘗西過景隨州不合去而新昌林令有肺腑親謹迎之乃東遵會稽從林游權而林稍嚴因從容諷以寬條卒弛嚴政而翁開州迎亦往翁卽夢鯉昌先生故所尤加恩而教之遂者也感而贈遺甚厚悉謝卻強之收一縑謂人曰吾非矯願以成翁子之介耳及中子爲漢川令少子授寧波推官

先生數往來二子間名就養實欲觀其政親教戒之每引古循良寬大及諸他名臣節廉爲法二子用父教所至多卓異先生喜會漢川忤景藩中貴人且得罪而寧波亦以舊嘗忤執政奪刑部謫武攸先生曰人臣當奉職死節官下吾兒素無點卽黜謫何憾哉其持政慷慨如此性孝友父嘗病躬率妻晝夜侍不解帶者數月備極勞苦人皆稱昌孝子歲大疫死亡甚眾夜若有物過門者戒毋犯昌孝子家人尤異之小弱弟家落與貲爲掾掾罷使治田田蕪售財財隨手盡每乏輒更給之不巳所親林玉中謫廢數與其子錢穀贍養林歿見其子必泣蓋昌先生篤大義有長厚德多此類居常忍詢耐